

NAHOIHNA LIIMLANGH IN MI

"Nang le nang ki en dihve lawm" cih kammal pen zakmun mahmah kammal khat hi dingin kalamen hi. Ei le ei ki ending cihpen i gen ciang a olmahmah abathangin, ataktak ciangin ahaksa mahmah thukhat ahihi. I mel nangawn liimlangh (mirror) ah i etkei leh aki mutheilo mihingte ihi zenhi. I pua lam melpuakzia, i mit omzia, i muk omzia, i nak apekzia le apumzia, i bil bangci om cihkhempuuh te nangawn liimlangh huhna lotawh, ei le ei aki theilo mihingte ihi tazen hi.

Lamkhatpan in genleng, honghuhding van khat teitei a omkei leh i mel hoihna, i mel siatna nangawn akitheilo dingte ihihi. Mite mitgol, mitneu i theih hangin eimit bangcia pha a, bangci om hiam cih i theih lohmun tammahmah hi. I maitang mahmah zong eimah le eimah i ki enthei kei a, i ki mutheikei hi. Tua i muh nadingin van ahi liimlangh (mirror) i zang hi. Kua in adek mu in, kua in atal mungei hiam? Kua in aluzang mu in, kua in abilteng muthei ahihiam? Tua te i muh theihna dingin liimlangh i zanghi.

Apualam melpuakzia ei le ei ki-et theih nadingin, liimlangh akisap mahbangan, asunglam ei le ei kiteltheih nading, ki ettheih nadingin zong liimlangh tawh akibang honghuhding kisan hi. Leitungah anungta ganhing ahi a, mihing i hi zongin, i zakna leh i muhna in i theihna leh thungaihsuttheih na te tung ah tampi takin gualzawhna nei hi. I zak 'awging' ahihkei leh 'aging' khat nangawn i zak ngeitawh akibangte bek i theitheih a, i zak aging khempuuh banghiam cih i theikhin ngeikei hi. Agingkhat phuuphuu i zak ciangin, i zakngei, i theihngei 'aging' te tawh khaikaak in: tua hi-in teh; tua hi thei in teh, thaunging hi, huihpi nung ging hi, mipau hi, kah aw hi, lasa awging hi, cih bangin i zak ngeite tungah i ngaihsutna te koih in, i zak 'awging' (aging) tawh kisai in khensatna i pia hi. I manhun a om mahbangan, ihkhialh hunzong tampi omveve hi.

I theihngei, i zakngei, i muhngei, i nekngai, i simngei cih te tawikhai in zangin, apiang thute tungah, i zak thute tungah

khensatna leh khentelna i pia hi. Zakna tampi nei in, muhna tampi anei te in, theihna tampi aneizaw hongsuak hi. Sa beng siamte in, zusa anzong ginzia leh Sakhi kheginzia abil in atheih hangin, adang tampi te in, zusa anzong ging nangawn sikha ci in, lau in taithei veve hi. Guitar tumin la i saksak hang in, *timing* man le man lo theituan lo in, nuam i sak mahmah hunzong omthei hi. Banghanghiam cih leh *timing* aman koidan hiam cih i bil in nathei lo a, i khut in nasai thei tuanlo hi. Ahi zongin, *timing* manman tawh lasa den mikhat in, *timing* manlo lasa te tawh nuamtak in lasa khawmthei nawnlo hi. Simbu in khuazing nuamsa in, nuamtak in alensuk alentoh zenzen hangin, sunkhuakvak ciangin, tangngam lozah dongin dawikhi khe in omhi. I tatna kuam i thei a, eima tual kaihna mun leh thu te ah i inntek thei hi.

Ei tawh kituak in, mi i mu a, i muh minu mipa tawh kituak in i muh ding haksa i sa mahmah hi. Banghanghiam cih leh, eimit tawh mi i en a, mi mittawh ei i ki enthei kei hi. Tua ahih manin, mi khattungah asia apha i muh na in, ei mamit hi a, ama mit hilo ahih manin, ei utbangin mu in, ei utbangin asia apha i khi hi. Midangte mit i kawmthei kei a, abilzong i zang khawm thei tuankei hi. Mit muhna in, eisunga omzia kilangsak a, bilzakna in thutheihzia hong kilangsak hi. I zak thu siangtak leh hoihtak i tel nadingin, tuatawh kizom thu tampi zakbeh ding kisam hi. Banghanghiam cih leh thu in mongnei a, teng zong nanei ahih man ahihi. Thu mong amuthei te in, thu guilet zia siam uha, adawn ateng khensiam in, atom asau ding bawl siam, zeksiam uhhi.

Thu mong muthei lo te in ahih leh, thu laisat in, a utut napan lennuam ahih manin, cikmah in, thubul cing thei kha lo hi. Thankik atuanna tawh kizui in amel kikhel ci-in, i sim mawhphial khading hi. Ei le ei hoihtak leh siangtak a akimu thei lo, ei mihing te ihih leh, tuanna i neih hetloh hang in, i mel kikkhel zia manlang mahmah zawlai thei hi. I hoihna nangawn hongtheih pihding, hoih asa ding midang a om kei leh, bangzahin nikhoih puanhoih silhin, bangzahin i kizem

zongin, bangmah kimanna a omkei hi. Mi dang aomman in i
hoihna kilang thei pan hi. Banghanghiam cihleh i hoihna athei
pen ei i hi kei a midangte (the other) ahi zaw hi. I sunga om
bangin i mit in muthei pan ahih manin, mi hoihna mu semsem
leng, eizong ahoih semsem kihi in, mi hoihna zaza leng,
eizong ahoihsemsem ding ihihi.